

22. fevrier 1620.



# DECLARATION DV ROY,

*Qui confirme les Priuileges accordez à ses  
Imprimeurs ordinaires.*



LOUIS par la grace de Dieu Roy de France & de Navarre, A tous ceux qui ces presentes lettres verront, Salut. Combien que les Roys nos predecesseurs de loüable memoire, ayent de tout temps fait choix & eslection d'Imprimeurs fideles & affectionnez pour imprimer toutes sortes d'Edicts, Ordonnances, Reglemens & Declarations importants leur service, Que nous ayons continué le mesme ordre depuis notre aduenement à la Couronne, & iceux Imprimeurs retenus comme nosdits predecesseurs pour estre du nombre de nos Officiers domestiques & commensaux, leur ayans mesme attribué gages dans l'Estat de nostre Maison, pour les obliger d'autant plus à nous seruir fidelement en leurs charges, comme font aujourd'huy Federic Morel & Pierre Mettayer, lesquels ou leurs peres ont successiuellement tenu & seruy esdites charges de nos Imprimeurs depuis cinquante ans & plus, au gré & contente-



ment de nosdits predecesseurs & de Nous : Ce neanmoins , il est souuent arriué dont nous auons receu plusieurs plaintes , que si nous proposons quelques Edicts , Declarations ou Reglemens , ils sont imprimez auparavant qu'ils soient resolués ou du moins verifiez , avec tant de fautes esdites impressions que nous & le public y sommes grandement interessez , outre le mespris que telles entreprises apportent à nostre auctorité. Pour à quoy remedier , & empescher le cours de tels desordres à l'aduenir , NOVS auons dict , declare , voulu & ordonné , disons , declarons , voulons , ordonnons , & nous plaist , que desormais lesdits Morel & Mettayer nos Imprimeurs ordinaires , imprimeront seuls toutes sortes d'Edicts , Ordonnances , Reglemens & autres Declarations qui seront par nous faicts : Comme aussi tous Arrests , tant de nostre Conseil que de nos Cours , sans que autres qu'eux le puissent plus entreprendre à leur prejudice , en quelque sorte ou maniere que ce soit : Ce que nous DEFENDONS à tous autres Imprimeurs sur peine de cinq cens liures d'amende : VOVLONS que tout ce qui se trouuera imprimé de ce que dessus , par autres que lesdits Morel & Mettayer , soit saisi & cancelé comme nul & faulx , fait sans nostre commandement & contre nostre auctorité. SI DONNONS en mandement à nos amez & feaux Conseillers les gens tenans nostre Cour de Parlement , Chambre de nos Comptes , Cour des Aydes , Prevoist de Paris ou son Lieutenant , & à tous nos Iusticiers & Officiers qu'il appartiendra , que ces presentes ils fassent lire , publier & enregistrer , & le contenu en icelles garder & observer inviolablement , selon leur forme & teneur. Enjoignant à nostre Procureur general y



5

tenir la main , en sorte que nous y soyons obey : Car tel est nostre plaisir. En tesmoin dequoy , nous auons faict mettre nostre scel à cefdites presentes. Données à Paris le vingt-deuxiesme jour de Feurier , l'an de grace mil six cent vingt. Et de nostre regne le dixiesme. Signé, LOVIS, Et sur le reply , De par le Roy , DE LOMENIE : Et scellées du grand scel sur double queuë de cire jaune. Et sur le dit reply est encore écrit :

*Registrées , ouy le Procureur General du Roy , pour jouyr par les impetrans du contenu en icelles selon leur forme & teneur. A Paris en Parlement le septiesme Mars , mil six cens vingt.*

Signé, DV TILLET.

*Registrées semblablement en la Chambre des Comptes , ouy le Procureur General du Roy , pour jouyr par les impetrans du contenu en icelles , selon leur forme & teneur , le huitiesme jour d'Aoust , mil six cens vingt.*

Signé, BOURLON.

*Registrées en la Cour des Aydes , ouy le Procureur General du Roy , pour jouyr par les impetrans du contenu en icelles , suiuant & aux charges portées par l'Arrest de ladite Cour du jourd'huy. A Paris le sixiesme jour d'Octobre , mil six cens vingt.*

Signé, DV PVR.

*Registrées au Chastelet , ouy le Procureur du Roy , pour jouyr par les impetrans de l'effet & contenu d'icelles , selon leur forme & teneur. A Paris le dixseptiesme Novembre , mil six cens vingt.*

Signé, MVSNIER.

*Enregistrées au Bailliage du Palais à Paris , en la presence du Procureur du Roy dudit Bailliage , pour jouyr par les impetrans du contenu en icelles , selon leur forme & teneur , le 27. jour de Septembre , mil six cens vingt.*

Signé, BOVSARD.



EXTRAIT DES REGISTRES DE LA COUR  
des Aydes.

**V**EV par la Cour les Lettres patentes du Roy données à Paris le vingt-deuxiesme Feurier mil six cens vingt, Signées LOVIS. Et sur le reply, Par le Roy, DE LOMBINIE : Et scellées du grand seau de cire jauné, obtenues par Federic Morel & Pierre Mettayer, Imprimeurs ordinaires de sa Majesté : Par lesquelles, & pour les causes y contenues, elle leur auroit accordé d'imprimer seuls toutes sortes d'Edicts, Ordonnances, Reglemens & autres Declarations qui seront par sadite Majesté faites : Comme aussi tous Arrests, tant de son Conseil que de ses Cours, sans qu'autres qu'eux le peussent plus entreprendre à leur prejudice en quelque sorte & maniere que ce fust, sur peine de cinq cens liures d'amende : & que tout ce qui se trouveroit imprimé de ce qui estoit contenu esdites Lettres, par autres que lesdits Morel & Mettayer, fust saisi, cancelé comme nul & faux, fait sans commandement de sadite Majesté & contre son autorité, comme plus au long le contiennent lesdites Lettres. Requête présentée à ladite Cour par lesdits impetrans, tendantes à l'entherinement desdites Lettres. Conclusions du Procureur general du Roy, & tout considéré ; LA COUR a ordonné & ordonne que lesdites Lettres seront registrées au Greffe d'icelle, pour jouir par les impetrans de l'effect y contenu. Et ce faisant, fait inhibitions & defenses à tous autres Libraires & Imprimeurs d'imprimer, vendre ny debiter aucuns Edicts, Ordonnances, Arrests, Reglemens, Baulx generaux & particuliers, & autres expéditions concernans les Finances, Aydes, Tailles & Gabelles de la Jurisdiction de ladite Cour, à peine d'amende arbitraire. A la charge neantmoins que lesdits impetrans ne pourront imprimer ny exposer aucunes copies desdits Edicts, Declarations, Lettres patentes & Baulx, sinon que les Arrests de verification soient inferez à la fin d'icelles, & à eux baillez de l'Ordonnance de ladite Cour par le Procureur general du Roy en icelle. Prononcé le sixiesme jour d'Octobre mil six cens vingt.

Signé, DV PVR.